

Siunnersuut: Meeqqanut suli atualinngitsunut perorsaanikkut inerikkiartuutaasunik ulluunerani neqerooruteqartarneq pillugu Inatsisartut peqqussutaat nr. x, xx. xx 2008-meersoq.

Kalaallit Nunaanni xxxxx pillugit inatsimmi nr. 580-imi, 29. november 1978-imeersumi § 2 naapertorlugu aalajangersarneqarpoq:

Kapitali 1
Siunertaq

§ 1. Peqqussutip siunertaraa meeraq qitiutillugu meeqqamullu angajoqqaatut oqartussaasut/meeqqamik pilersuisuiusut suleqatigalugit meeqqanut ataasiakkaanut annertunerpaamik pitsaanerpaamillu ikorfartuinissap qularnaarneqarnissaa, tassuunakkut meeqqap peqqissumik imaqarluartumillu inerikkiartornissaa qularnaarumallugu.

§ 2. Inatsisartut peqqussutaat manna naapertorlugu meeqqanut ulluunerani neqeroorutit siunertaraat:

- 1) meeqqap inuttut, piginnaasatigut aamma tarnikkut timikkullu pisinnaasaanut naleqqiullugu pisinnaasaasa tamakkiisumik inerikkiartortinnissaat,
- 2) inuttut pisinnaatitaaffiit aamma tunngaviusumik kiffaanngissuseqarnermik pisinnaatitaaffiit tunngaviillu, Naalagaaffiit Peqatigiit Isumaqatigiisutaanni allassimasut, ataqqineqarnissaannik inerisaanissaq,
- 3) meeqqat angajoqqaavinut ataqqinninnermik, nammineq kulturikkut kinassusaanut, oqaasiinut pingaartitanut aamma nunami meeqqap najugaqarfiani nunamilu meeqqap kingoqqiffiani inuiattut pingaartitanut kulturinullu meeqqap nammineq kulturianit allaanerusunut ataqqinninnermik inerisaanissaq,
- 4) meeraq inuiaqatigiinni kiffaanngissuseqartuni akisussaalluni inooqataanissamut piareersassallugu, paaseqatiinneq, eqqissineq, akaareqatigiinneq, suaassutsikkut naligiissuseqarneq - inuiaat, ammit qalipaataasa, naalagaaffiit upperisallu akornanni naligiissuseq anersaaralugit, aamma
- 5) meeraq periarfississallugu misigisaqarnissamut sammisaqarnissamullu - meeqqap takorluuisinnaassusianik, pilersitsisinnaassusianik inerikkiartorneranillu kaammattueqataasunik aamma pinngortitamik ataqqinnilersissallugu.

Imm. 2. Meeqqat suli atualinngitsut akornanni perorsaanikkut suliat Inatsisartut peqqussutaat manna naapertorlugu ingerlanneqartut tamarmik, angajoqqaatut oqartussaassuseqartut/meeqqamik pilersuisuiusut meeqqamullu attaveqaataasut suleqatigalugit pissapput, qularnaassallugulu atuarfimmuut ikaarsaariarluarnissaq piginnaasat tunngaviusut ilikkariartornissamullu kajumissutsip inerisarlugillu

tapersorsornerisigut, aamma meeqqap inooqatigiissutsikkut nalinginnaasumillu pisinnaasaanik pigiliussiniarnerani kaammattuillunilu inerisaanikkut.

Nassuiaatit atuuffillu

§ 3. Perorsaanikkut ineriartuutaasumik ulluunerani meeqqanut neqeroorutit tassaapput neqeroorutit sammisaqartitsiviusut, meeqqanut perorsaanikkut anguniagalimmik ingerlatsiviusut, assersuutigalugu meeqqerivinni, angerlarsimaffimmi paarsisarfinni pinnguarterfinnilu ingerlanneqartut.

Apeqqutaanngilaq ulloq naallugu imaluunniit ullup ilaa neqeroorutaanersoq.

Imm. 2. Meeqqat suli atualinngitsut tassaapput meeqqat 0-miit 6-inut ukiullit, imaluunniit atuarfik pillugu peqqussut naapertorlugu atuartitaasussaataanerup aallartinnera tikillugu.

Imm. 3. Meeqqat suli atualinngitsut immikkut ittunik pisariaqartitsisut Inatsisartut peqqussutaannut matumunnga ilaapput.

Qullersaasutut akisussaaffik

§ 4. Meeqqanut suli atualinngitsunut perorsaanikkut inerikkiartutaasumik ulluunerani neqeroorutit Naalakkersuisut qullersaasutut nakkutigissavaat.

Imm. 2. Naalakkersuisut pisussaafigaat makkua isumaginissaat:

1) Suli atualinnginnermut tunngasut iluanni perorsaanikkut-tarnip pissusaasigut ilisimatusarneq.

2) Meeqqanut ulluunerani neqeroorutit nutaamik ilusillit inerisarnissaat, taakkununnga ilaallutik nunaqarfinni pissutsinut naleqqussagaasumik allaanerusumik meeqqanut ulluunerani neqerooruteqartarneq.

3) Perorsaasunik ilinniartitsinerit, taakkununnga ilaallutik najugaq qimannagu perorsaasunik ilinniartitsinerit.

4) Perorsaanermik ilinniagallit ilinniarteqqittarnerat ingerlaqqiffiusumillu ilinniartitaanerat.

5) Suliamik ilinniagaqanngitsunik allagartartaarutaasinnaasunik ilinniartitsinerit.

6) Kisitsisitigut paasissutissanik katersinissamut sakkussanik inerisaaneq.

Imm. 3. Suliassat imm. 2-mi taaneqartut suliarinissaannut perorsaanikkut-tarnip pissusaanut tunngasutigut qitiusumik inerisaavimmik pilersitsisoqassaaq.

Imm. 4. Inatsisartut eqqussutaat manna naapertorlugu suliassat isumaginissaannut pisariaqartunik, Naalakkersuisut kommunalbestyrelsi paasissutisseeqqusinnaavaat.

§ 5. Naalakkersuisut makku pillugit malittarisassaliussapput:

1) meeqqat kommunini meeqqanut ulluunerani neqeroorutinut peqataanerannut akiliuteqartarneq, tassunga ilaatillugit akiliutit kommunit meeqqanut ulluunerani neqeroorutinut aningaasartuutaat angajoqqaallu aningaasaqarnerat eqqarsaatigalugit aalajangiunneqarnissaat, angajoqqaat akiliutaasa isertitat naapertorlugit aaqqiffigineqartarnissaat, akiliutissanik kinguaattoortoqartillugu meeqqamik anisitsisinnaaneq, aamma kommunimi meeqqanut ulluunerani neqeroorutinik atorunnaarsitsineq anisitsinerlu pillugit aalajangersakkat.

2) Peqqinnissakkut Nakkutilliisoqarfik suleqatigalugu nappaatit tunillaassortut

pillugit aalajangersakkat.

Imm. 2. Naalakkersuisut meeqqeriviit pilersinneqartarneri pisatsersornerilu pillugit tunaartarisassaliussapput.

Imm. 3. § 16 naapertorlugu paasissutissanik naapertuuttunik ingerlatitseqqittarneq pillugu Naalakkersuisut tunaartarisassanik aalajangersaasinnaapput.

Imm. 4. Kommunalbestyrelsip nalinginnaasumik perorsaanikkullu nakkutilliinera pillugu Naalakkersuisut tunaartarisassaliorsinnaapput.

§ 6. Kommunalbestyrelsip pisussaaffigaa qularnaassallugu meeqqanut suli atualinngitsunut tamanut pisariaqartunik amerlassusilinnik ulluunerani neqerooruteqarnissaq.

Imm. 2. Kommunalbestyrelsip meeqqanut ulluunerani neqeroorutit tamaasa nalinginnaasumik perorsaanermullu tunngatillugu nakkutigissavai pisortat suliamut tamatumunnga naapertuuttut suleqatigalugit. Kommunimi angerlarsimaffimmi paarsisarfiit minnerpaamik ukiumut sisamariarluni nakkutilliilluni orninneqartassapput, taakkunanngalu minnerpaamik ukiumut ataasiarluni siumoortumik nalunaqqaarani nakkutilliisoqartassalluni.

Imm. 3. Aammattaaq kommunalbestyrelsip makku qullersaaffigalugit akisussaaffigai:

1) Kommunimi meeqqanut inuusuttunullu politikikiliornissaq.

2) Ulluunerani neqeroorutit ataasiakkaat perorsaanikkut ukiumoortumik pilersaarusiornissaat, taakkualu nalilernissaat, tak. § 18, imm. 2.

3) Nunaqarfinni meeqqanut ulluunerani neqeroorutit illoqarfimmilu ulluunerani neqeroorutit akornanni aalajangersimasumik attaveqartarnissaq, perorsaanikkut isumassarsioqatigiittarnissaq siunertaralugu.

Meeqqat ataasiakkaat pillugit suleqatigiinneq

§ 7. Meeqqat ataasiakkaat pillugit attaveqatigiit ataqatigiissakkamik suleqatigiinnissaat qularnaarumallugu, kommunalbestyrelsit pisariaqartitsineq naapertorlugu suleqatigiinnik pilersitsisinnaapput, ingerlatsiveqarfiit ataasiakkaat akimorlugit meeqqat ataasiakkaat pillugit toqqaannartumik suliaqartunik inuttalikkanik.

Kapitali 2

Inissamik innersuussineq

§ 8. Kommunalbestyrelsi kommunimi meeqqerivinnut angerlarsimaffimmilu paarsisarfinnut inissamik innersuussisarpoq.

Imm. 2. Nalornisoqalersillugu kommunalbestyrelsip suliamik immikkut ilisimasallit pisariaqartitsineq naapertorlugu peqataatissinnaavai.

§ 9. Kommunalbestyrelsip suliassaraa meeqqat 0-miit 2-nik ukiullit meeraaqqerivinnut kommunimilu angerlarsimaffimmi paarsisartunut innersuunnissaat, meeqqallu 3-niik 6-nut ukiullit meeqqerivinnut kommunimilu

angerlarsimaffimmi paarsisartunut innersuunnissaat.

Imm. 2. Pissutsit allakkut ajornartitsingippata meeqqat 2-nik ukiullit meeqquerivinnut innersuunneqarsinnaapput.

Imm. 3. Qinnuteqartunut tamanut inissamik qularnaarisoqarsimatinnagu utaqqisut allassimaffiat pilersinneqassaaq.

Imm. 4. Utaqqisut allattorsimaffiisa ilusissaat imarisassaallu pillugit kommunalbestyrelsi malittarisassanik aalajangersaasinnaavoq.

Tulleriarineq

§ 10. Kommunimi meeqqueriviit imaluunniit angerlarsimaffimmi paarsisarfiit inissaqalersillugit, kommunalbestyrelsi meeqqat utaqqisut akornanni toqqartuissaaq, kommunimi meeqquerivinnut imaluunniit angerlarsimaffimmi paarsisarfinnut naapertuuttumik ukiullit akornanni, ataani tulleriarinissamik innersuussutit malillugit, taamaattorli meeqqat a-mi aamma b-mi pineqartut allanit tamatigut siullinneqartassapput, angajoqqaatut oqartussaasut/meeqqamik pilersuisuisut akornanni pissutsit apeqqutaatinnagit. Aappariit katissimangikkaluarlutik inooqatigiittut meeraat angajoqqaatut oqartussaasut/meeqqamik pilersuisuisut katissimasut meerattorluinnaq pineqassapput.

- 1) Ataatsimoortut a: Meeqqat - isumaginninnermut ataatsimiititaliamit innersuunneqartut - immikkut perorsaaniikkut pisariaqartitsinertik pissutsilluunniit allat meeqqap inerikkiartorneranik ulorianartorsiortitsisinnaasut pissutigalugit.
- 2) Ataatsimoortut b: Meeqqat meeraaqquerivinniit kommunimiluunniit angerlarsimaffimmi paarsisarfinniit meeqquerivinnut ukiutik pissutigalugit nuuttussat.
- 3) Ataatsimoortut c: Meeqqat suliffeqartunik imaluunniit ilinniartunik kisermaajusunik angajoqqaallit/pilersuisueqartut.
- 4) Ataatsimoortut d: Meeqqat angajoqqaatut oqartussaasui/pilersuisuisut tamarmik suliffeqartut imaluunniit tamarmik ilinniagaqartut.
- 5) Ataatsimoortut e: Meeqqat angajoqqaatut oqartussaasuseqartup/pilersuisuisup aappaa suliffeqartoq imaluunniit angajoqqaap aappaa ilinniagaqartoq.
- 6) Ataatsimoortut f: Meeqqat angajoqqaatut oqartussaasui/pilersuisuii tamarmik suliffeqanngitsut imaluunniit ilinniagaqartuunngitsut.

Imm. 2. Kommunalbestyrelsip utaqqisut allassimaffianniit toqqartuinnermini ilutigisaanik qularnaassavaa, meeqqueriviit ataasiakkaat meerartaasa - perorsaaniikkut anguniagassat pissutigalugit - ukiumikkut naammaginartumik siammaassimanissaat, nukappiaqqat niarsiaraqqallu sapinngisamik amerlaqatigiinnissaat, aamma meeqqat immikkut ittumik pisariaqartitsisut aamma/imaluunniit tapersersorteqartut nammaginartumik siammaassimanissaat.

Imm. 3. Illoqarfigisap nunaqarfigisalluunniit iluani meeqquerivimmu allamut aatsaat nuuttoqarsinnaavoq, tamanna meeqqap atugarissaarnissaanik peqqissusaanillu imaluunniit angallassinikkut pissutsit ajornakusoornerannik pissuteqarpat.

Kapitali 3

Meeqqueriviit

§ 11. Meeqqueriviit tassaapput suliffeqarfiit, sulisut perorsaanikkut ilinniagallit perorsaanikkut anguniagaqartumik meeqqanik ataatsimoortunik minnerpaamik 12-nik sullissiffigisaat, avatangiiserisat meeqqat sulisullu pisariaqartitaannut naleqqussagaassallutik oqartussaasunillu naapertuuttunit akuerisaassallutik.

Imm. 2. Meeqqueriviit kommunimit ingerlataasinnaapput imaluunniit tassaasinnaallutik suliffeqarfiit imminnut pigisut arfinilinnik amerlanernilluunniit meerartallit, kommunalbestyrelsimit ingerlatsineq pillugu isumaqatigiissuteqarfigineqarsinnaasut.

§ 12. Meeqqueriviit pilersinneqassapput 0-imiit 2-nik ukiulinnut meeraaqqerivittut, 0-imiit 6-inut ukiulinnut meeqqat ukiui naapertorlugit agguaassiviusumik meeqquerivittut, 3-miillu 6-inut ukiulinnut meeqquerivittut.

Imm. 2. Meeqqueriviit meeqqanut ataatsimoortunut agguaanneqassapput, meeqquerivinni meeqqat ataatsimoortut amerlanerpaamik 20-nik meerartaqarsinnaallutik, meeraaqqerivinnilu amerlanerpaamik 12-inik.

Imm. 3. Meeqqat immikkut ittunik pisariaqartitsisut inissanik §§ 1-ip 2-llu anguneqarnissaannut pisariaqartunik, kommunalbestyrelsimit/meeqqueriviup imminut pigisup siulersuisunit aalajangiunneqartunik tunineqassapput – meeqqueriviup inassuteqareerneratigut. Meeqqat ataasiakkaat pillugit suleqatigiinnik, tak. § 7, pilersitsisoqarsimappat suleqatigiit aalajangiinermi peqataatinneqarsinnaapput.

Meeqqueriviit illutaannut piumasaqaatit

§ 13. Meeqqueriviit tamarmik atorneqalernerminni ingerlaavartumillu nakkutilliinikkut qatserisartutut oqartussaasunit, peqqinnissamut oqartussanit kiisalu Sullivinnik Nakkutilliisoqarfimmit akuerisaassapput.

Imm. 2. Kommunalbestyrelsip illut akuerissavai, pisortanillu piumasaqaatit piviusunnngortinneqarsimanerat nakkutigissallugu.

Imm. 3. Inissat aalajangiussat amerlassusaannik imaluunniit illunik allannguisoqannginnerani qatserisartutut oqartussaasut, peqqinnissamut oqartussat kiisalu Sullivinnik Nakkutilliisoqarfik allannguutissanik akuersissuteqaqqaartassapput.

Meeqqueriviit akuerisaanerannut uppernarsaat

§ 14. Meeqqueriviit tamarmik akuerisaanerminnut uppernarsaateqassapput, meeqquerivimmi ersittumi nivingasussamik.

Imm. 2. Akuerisaanermut uppernarsaatip makku pillugit paasissutissat imarissavai:

- 1) Meeqqueriviup aqqa, najugaqarfia sumiiffialu.
- 2) Meeqqueriviup anguniagai
- 3) Meeqqueriviup pisortaa
- 4) Kommunimi ataatsimiititaliaq attavigisaaq aamma/imaluunniit meeqqueriviup imminut pigisup siulersuisui.
- 5) Inissat amerlassusaat.
- 6) Sulisut amerlassusaat.
- 7) Piffissat ammasarfiit.

- 8) Pisortanit naapertuuttunit akuersissutit, taakkununga ilaallutik qatserisartutut oqartussaasunit, peqqinnissamut oqartussanit, Sullivinnik Nakkutilliisoqarfimmit kommunalbestyrelsimillu akuersissutit taakkualu ullui.
- 9) Meeqqueriviup ukiumoortumik pilersaarutaata sumi pissarsiarineqarsinnaanera taassumalu inatsisitigut tunngavigisai naapertuuttut pillugit paasissutissat.

Naliliineq uppernarsaasersuinerlu

§ 15. Meeqqueriviup meeqqat ataasiakkaat inerikkiartornerat pillugu ataatsimoortumik naliliinikkut naliliinerit uppernarsaasersuinerillu ingerlaavartumik isumagissavai, meeqqallu inerikkiartornera minnerpaamik ukiumut marloriarluni allaaserisassallugu.

Imm. 2. Meeqqap inerikkiartornera pillugu allaaserisat angajoqqaatut oqartussaasut/meeqqap pilersuisuii inuillu suliamik ingerlatallit naapertuuttut suleqatigalugit malitseqartinneqartassapput.

Imm. 3. Meeqqueriviit pisussaaffigalugu minnerpaamik ukiumut marloriarlutik angajoqqaanik oqaloqateqartassapput meeqqap inerikkiartoqqinnerani suleqatigiinnissaq siunertaralugu.

§ 16. Meeqqap suliffeqarfimmiit suliffeqarfimmut allamut nuunnerani meeqquerivimmi meeqqap qimataani sulisut paasissutissanik naapertuuttunik suliffeqarfimmut nuuffiusumut ingerlatitseqqittassapput.

Meeqqueriviup pisortaa

§ 17. Meeqqueriviup pisortaa perorsaasutut ilinniagaqassaaq ininilu sulisut amerlassusissaattut aalajangiussaasunut ilaassanani.

Imm. 2. Meeqquerivinni kommunip pigisaani meeqqueriviup pisortaa kommunalbestyrelsimit atorfinitsinneqassaaq atuisut ataatsimoorfiata inassuteqareerneratigut.

§ 18. Meeqqueriviup pisortaata perorsaanikkut allaffissornikkullu akisussaaffigaa, meeqqueriviup illersorneqarsinnaasumik malittarisassallu atuuttut naapertorlugit ingerlanneqarnissaa. Meeqqueriviup pisortaata sulisunut tunngasut aamma atuisut ataatsimoorfianni aalajangiussat taakkua innersuussutaat naapertorlugit piviusunnngortinneqarnissaat akisussaaffigaa.

Imm. 2. Meeqqueriviup pisortaata aammattaaq akisussaaffigaa, meeqqueriviup perorsaanikkut ukiumoortumik pilersaarusiornissaa aningaasaqarnikkullu missingersersuusiornissaa.

Imm. 3. Meeqquerivinni kommunip ingerlassaani aamma meeqquerivinni imminnut pigisuni kommunalbestyrelsimit ingerlatsinissaq pillugu isumaqatigiissuteqarfigineqartuni missingersersuutit suliarineqassapput kommunalbestyrelsip malittarisassiai naapertorlugit. Meeqquerivinni imminnut pigisuni missingersersuutit suliarineqassapput siulersuisut malittarisassiaat naapertorlugit.

§ 19. Meeqqueriviup pisortaata akisussaaffigaa meeqqat meeqquerivimmut allatseqqasut nalunaarsorsimanissaat, meeqqat aqqi, inuttut normui, angajoqqaatut oqartussaasut/meeqqamik pilersuisuisut aqqi, meeqqallu aninerani tamatumunnga pissutaasoq ilanngullugit. Aammattaaq meeqqat takkuneri nalunaarsorneqassapput, ullut tamaasa qanoq sivisutigisumik najunnerat nalunaarlugu.

Stk. 2. Meeqqueriviit kommunimit ingerlanneqartut aamma meeqqueriviit kommunalbestyrelsip ingerlatsinissaq pillugu isumaqatigiissuteqarfigisimasaasa meeqqat takkunerinut nalunaarsuiffik ukiumoortumik perorsaanikkut pilersaarummik tapertaqartillugu kommunalbestyrelsimut nassiuttassavaat.

Meeqquerivinni kommunit ingerlassaanni sulisut amerlassusissaat

§ 20. Meeqqat ataatsimoortut tamarmik minnerpaamik sulisorissavaat perorsaasoq 1, perorsaanermik ilinniarsimasoq 1 ikiortilu 1. Sungiusarlutik sulisut tapersersortaasullu sulisut amerlassusissaannut ilaatinneqanngillat.

Imm. 2. Meeqqueriviup ammanerata nalaani tamatigut meeqqani ataatsimoortuni tamani minnerpaamik sulisut marluussapput, meeqquerivimmilu perorsaanermik ilinniagalik minnerpaamik ataasiussalluni.

Imm. 3. Meeqquerivik pisariaqartitaminik igaffimmi eqqiaasutullu sulisoqassaaq.

Imm. 4. Imm. 1-3-mi pineqartut aallaavigalugit kommunalbestyrelsip meeqqueriviit ataasiakkaat sulisuisa amerlassusissaat aalajangissavaa, pisortallu saniatigut sulisut atorfinitsinneqartarnissaat pillugu tunaartarisassaliussallutik..

Meeqquerivinni kommunit ingerlassaanni atuisut ataatsimoorfiat

§ 21. Meeqquerivinni tamani pisortap minnerpaamik ukiumut sisamariarluni atuisut ataatsimoorfiat ataatsimiigiaqquisassavaa, taakku tassaapput angajoqqaatut oqartussaasut/meeqqamik pilersuisuiit meeqquerivimmilu sulisut tamarmik.

Imm. 2. Atuisut ataatsimoorfiata suliassarai

1) meeqquerivimmi sammisassanik imaluunniit suliniutinik siunnersuillunilu aaqqissuussineq - meeqqanut anguniagalimmik suliaqarnissamut aamma angajoqqaatut oqartussaasunut/meeqqamik pilersuisuisusunut naleqqiullugu,

2) perorsaanikkut ukiumoortumik pilersaarutit suliarineranni peqataaneq,

3) perorsaanikkut ukiumoortumik pilersaarutit malitseqartinnerat,

4) pisatsersuinnermut avatangiiserisallu allanngortinnissaannut tunngasunik siunnersuuteqarneq aamma

5) pissutsit meeqqat ulluinnarisaannut ersarissumik pingaaruteqartut pillugit aalajangiinerit.

6) meeqqueriviup pisortaata atorfinitsinnerani kommunalbestyrelsimut inassuteqarneq.

Imm. 3. Atuisut ataatsimoorfianni nalinginnaasumik amerlanerussuteqarneq naapertorlugu aalajangiisoqartassaaq. Kommunimi atuisut ataatsimoorfiisa ulluinnarni ingerlatsinerminni malittarisassaannik tamanut atuuttussamik kommunalbestyrelsi suliaqarsinnaavoq.

Imm. 4. Atuisut ataatsimoorfiat pisariaqartitsineq naapertorlugu

ataatsimiititaliaagallartussanik, atuisut ataatsimoorfiannut nalunaartartussanik, pilersitsisinnaavoq.

Meeqqeriviit imminnut pigisut aqunneqarnerat

§ 22. Meeqqerivinni imminnut pigisuni siulersuisunik qullersaallutik aqutsisuusussanik pilersitsisoqassaaq.

Imm. 2. Meeqqerivinni imminnut pigisuni meeqqeriviup pisortaa siulersuisunit atorfinitsinneqassaaq. Siulersuisut sulisut allat atorfinitsinneqarneranni tunaartarisassanik aalajangersaassaaq.

Kapitali 4

Angerlarsimaffimmi paarsineq

§ 23. Angerlarsimaffimmi paarsisarfik tassaavoq perorsaanikkut kaammattuiffiusumik paarsinissamik neqeroorut ullup-unnuallu ilaa angerlarsimaffimmi meeqqap angerlarsimaffiginngisaani imaluunniit tamanit katersuuttarfimmi ingerlanneqartoq.

Imm. 2. Kommuni angerlarsimaffimmi paarsisarfia tassaavoq angerlarsimaffimmi paarsineq kommunimit pilersinneqarlunilu innersuunneqartoq, angerlarsimaffimmi paarsisartoq kommunimit atorfinitsinneqarlunilu akissaateqartinneqarluni.

Imm. 3. Angerlarsimaffimmi paarsineq namminerisamik ingerlanneqartoq tassaavoq akilerneqarluni angerlarsimaffimmi paarsisarfik namminerisamik pilersinneqarlunilu ingerlanneqartoq. Namminerisamik angerlarsimaffimmi paarsisarfiit malittarisassat kommunip angerlarsimaffimmi paarsisarfiinut atuuttut maleruassavaat.

Angerlarsimaffimmi paarsisartunik angerlarsimaffinnillu paarsiffiusunik akuersineq

§ 24. Kommunalbestyrelsip angerlarsimaffimmi paarsisartut angerlarsimaffiillu paarsiffiusut qinnuteqartoqareerneratigut allakkatigut akuersissavai.

Imm. 2. Angerlarsimaffimmi paarsisartoq timikkut tarnikkullu pillorissuussaaq aamma perorsaanikkut kaammattuutaasunik sammisaqartitsinernik neqeroornissaminut piginnaasaqassalluni.

Imm. 3. Angerlarsimaffimmi paarsisartup illoqatigiunnagaasalu tamarmik peqqissutsimut uppersaat qaammatinik pingasunik pisoqaanerunngitsoq takutissinnaassavaat. Angerlarsimaffik paarsiffissatut akuerineqarsinnaanngilaq, angerlarsimaffimmi paarsisartoq illoqataaluunniit ukiut kingulliit marluk ingerlaneranni ilaqutariissutsimut tunngasuni, kinguaassiuutitigut ileqqorissaarnissamat aamma inuunermut timimullu pinerluuteqarsimasutut eqqartuussaasimappata imaluunniit angerlarsimaffimmi tunillaassuuttumik naapaateqartoqarpat.

Imm. 4. Angerlarsimaffimmi paarsineq tamanit katersuuttarfimmi pippat imm. 2-mi aamma imm. 3-mi aalajangersakkat taamaallaat paarsisartumut atuutissapput.

Imm. 5. Namminerisamik angerlarsimaffik imaluunniit tamanit katersuuttarfik

meeqqanik paarsisarfissatut akuerineqartinnagu, kommunalbestyrelsip illutaasut nalileqqaassavai.

Imm. 6. Kommunalbestyrelsip nalilerpagu angerlarsimaffimmi paarsisartutut angerlarsimaffiilluunniit paarsiffiusut akuerineqarsinnaanerannut tunuliaqutaasut peeruttut, akuersineq atorunnaarsineqassaaq.

Angerlarsimaffimmi paarsinermik innersuussineq

§ 25. Meeqqat suli atualinngitsut katillugit sisamat angerlarsimaffimmi paarineqarnissaat kommunalbestyrelsimit akuerineqarsinnaavoq. Angerlarsimaffimmi paarsiffiusumi ataatsimi nammineq meeqqat 6 inorlugit ukiullit meeqqallu paarisat tallimat qaangissanngilaat.

Imm. 2. Angerlarsimaffimmi paarsisoq amerlanernik paarsisaqarsinnaavoq imaluunniit angerlarsimaffimmi paarsisartumut allamut taartaasinnaavoq piffissami killilimmi, isumaqatigiissut naapertuuttoq naapertorlugu.

Atuisut ataatsimoorfiat

§ 26. Angerlarsimaffimmi paarsisarfinni tamani angerlarsimaffimmi paarsisartuq minnerpaamik ukiumut sisamariarluni atuisut atsimoorfiannik ataatsimiigiaqqusissassaaq. Atuisut ataatsimoorfiannut ilaapput angajoqqaatut oqartussaasut/meeqqamik pilersuisuiit tamarmik aamma angerlarsimaffimmi paarsisartuq. Illoqarfimmi nunaqarfimmiluunniit ataatsimi angerlarsimaffimmi paarsisartut arlaqarpata, angerlarsimaffimmi paarsisarfiit tamarmik ataatsimoorlutik atuisut ataatsimoorfiannik pilersitsisinnaapput.

Imm. 2. Atuisut ataatsimoorfiata suliassarai

- 1) angerlarsimaffimmi paarsiffimmi sammisassanik imaluunniit suliniutinik siunnersuillunilu aqqissuussineq - meeqqanut anguniagalimmik suliaqarnissamut aamma angajoqqaatut oqartussaasunut/meeqqamik pilersuisuiusunut naleqqiullugu,
- 2) pissutsit meeqqat ulluinnarisaannut ersarissumik pingaaruteqartut pillugit aalajangiinerit.

Imm. 3. Atuisut ataatsimoorfianni nalinginnaasumik amerlanerussuteqarneq naapertorlugu aalajangiisoqartassaaq. Kommunimi atuisut ataatsimoorfiisa ulluinnarni ingerlatsinerminni malittarisassaannik tamanut atuuttussamik kommunalbestyrelsi suliaqarsinnaavoq.

Imm. 4. Atuisut ataatsimoorfiat pisariaqartitsineq naapertorlugu ataatsimiititaliaagallartussanik pilersitsisinnaavoq.

Kapitali 5

Sammisaqartitsinissamik neqeroorutit allat

§ 27. Kommunalbestyrelsi meeqqanut suli atualinngitsunut sammisaqartitsinissanik allanik neqerooruteqarsinnaavoq, sumiiffinni ataasiakkaani kissaatigisat pisariaqartitsinerillu tunuliaqutaralugit. Sammisaqartitsinissamik neqeroorutit allat

akeqanngillat.

Imm. 2. Sammisaqartitsinissamik neqeroorutit allat tassaapput piffissap ilaa neqeroorutit, meeqqanut suli atualinngitsunut inersimasumik ilaqartunut saaffiginnittut, meeqqap inerikkiartorfissaasa ataatsip arlallilluunniit iluanni anguniagaqartumik sammisaqartitsinermik imaqartut.

Imm. 3. Sammisaqartitsinissamik neqeroorutit allat pilersinnissaat aallartinnissaallu siunertaralugu ataqatigiissaarisussamik toqqaanissaq kommunalbestyrelsip pisussaaffigaa. Ataqatigiissaarisup sumiiffinni ataasiakkaani peqatigiiffiit, inuit isumalluutigineqarsinnaasut suliampilu ilisimasallit naapertuuttut allat suleqatigissavai.

Kapitali 6

Aalajangersakkat tamanut atuuttut

Aningaasalersuineq

§ 28. Meeqquerivinnut, angerlarsimaffinni paarsisarfinnut aamma sammisaqartitsinissamik neqeroorutinut allanut Inatsisartut peqqussutaat manna naapertorlugu ingerlanneqartunut aningaasartuutit kommuninit akilerneqassapput.

Imm. 2. Namminersorerullutik Oqartussat meeqqueriviit pilersinnerinut tapiissuteqarsinnaapput.

Misileraalluni aaqqissuussinerit

§ 29. Kommunalbestyrelsip inassuteqareerneratigut, Naalakkersuisut kommunini meeqqanut suli atualinngitsunut ulluunerani neqeroorutinik misileraalluni aaqqissuussinerit akuerisinnaavaat.

Imm. 2. Kommunimi misileraalluni aaqqissuussineq sivisunerpaamik ukiuni pingasuni atuussinnaavoq.

Imm. 3. Kommunimi misileraalluni aaqqissuussinermut atatillugu, tak. imm. 1, ukiut tamaasa nalunaarusiortoqartassaaq Naalakkersuisunut tunniunneqartussamik.

Maalaaruteqarsinnaaneq

§ 30. § 10 aamma § 24, imm. 1 naapertorlugit kommunalbestyrelsip aalajangiineri Inunnik Isumaginninnermi Maalaaruteqartarfimmut maalaarutigineqarsinnaapput, Inunnik isumaginninnerup aqunneqarnera aaqqissugaaneralu pillugu Inatsisartut peqqussutaanni aalajangersakkat naapertorlugit.

Imm. 2. Inatsisartut peqqussutaanni matumani aalajangersakkat allat naapertorlugit kommunalbestyrelsip aalajangiineri ingerlatsinikkut oqartussanut allanut maalaarutigineqarsinnaanngillat.

Imm. 3. Inatsisartut peqqussutaat manna naapertorlugu malittarisassaliat naapertorlugit kommunalbestyrelsip aalajangiineri ingerlatsinikkut oqartussanut allanut maalaarutigineqarsinnaanngillat.

Atuuttuulersitsineq

§ 31. Inatsisartut peqqussutaat manna atuuttuulissaaq 1. januar 2009.

Imm. 2. Ilutigisaanik atorunnaarsinneqarput

- 1) Ulluunerani paaqqinnittarfiit, ulluunerani angerlarsimaffimmi paaqqinniffiit il.il. pillugit Inatsisartut peqqussutaat nr. 7, 21. maj 2002-meersoq kingusinnerusukkut allannguutai ilanngullugit,
- 2) Ulluunerani paaqqinnittarfiit aqunneqarnerat, siulersugaanerat ingerlanneqarnerallu pillugit Namminersornerullutik Oqartussat nalunaarutaat nr. 5, 16. april 2007-imeersoq, § 2 pinnagu, taanna atorunnaarsinneqassaaq 1. marts 2009,
- 3) Kommunit aaqquissuussaannik ulluunerani angerlarsimaffimmi paarsisitsisarneq pillugu Namminersornerullutik Oqartussat nalunaarutaat nr. 65, 29. december 1994 - meersoq aamma
- 4) Meeqqat ullukkuinnaq paaqqinnittarfinnut/ulluunerani angerlarsimaffimmi paaqqinnittarfinnut kommunemit ingerlanneqartunut inissinneqartarnerat pillugu Isumaginninnermi Pisorta qarfiup kaajallaasitaa nr. 129, 11. december 1978-imeersoq.

Imm. 3. Sunngiffimmi sammisaqartitsinerup aaqquissugaanera pillugu Inatsisartut peqqussummik atuuttuulersitsinissaasa tungaannut kommunalbestyrelsip suli pisussaaffigivaa meeqqat 7-iniik 15-inut ukiullit fritidshjemminut innersuuttarnissaat, tak. § 9, imm. 1. Kommunalbestyrelsi utaqquisunut allasimaffiliussappat meeqqat taakku ataatsimoortunut b-nut ilanngunneqassapput, tak. § 10, imm. 1, nr. 2.

Imm. 4. Inatsisartut peqqussutaat imm. 2, nr. 1-imi taaneqartoq naapertorlugu aalajangersakkat atuuttuulersinneqarsimasut imaluunniit suli atuutsinneqartut Inatsisartut peqqussutaat imaluunniit Inatsisartut peqqussutaat alla tunngavigalugu taarserneqarnissamik atorunnaarsinneqarnissamilluunniit tungaanut atuutissapput.

Namminersornerullutik Oqartussat, xx. xx 2008

Tommy Maru

/

Lise Lennert Olsen